

祕傳證治要訣卷三

大醫院使戴元禮述

諸氣門

七氣

七氣致病雖本一氣而所以爲氣者隨證而變三因
方論最詳喜怒憂思悲恐驚謂之七氣所傷有小疾
在咽喉間如綿絮相似咯不出嚥不下並宜四七湯
未効進丁沉透膈湯審知是思慮過度宜四七湯去
茯苓加半夏如數仍加石菖蒲人參各半錢審知盛
怒成疾面色青黃或兩脇脹滿宜調氣散或四七湯

加枳殼木香各半錢因驚恐得疾心下愷忡者見驚悸門外有七氣眩暈者當於諸中門中氣證取藥

痞塞

附噎膈

諸痞塞及噎膈乃是痰爲氣所激而上氣又爲痰所膈而滯痰與氣搏不能流通並宜用二陳湯加枳實確砂仁各半錢木香一錢或五膈寬中散應諸痞塞脹滿胸膈不利或氣上逆或腹疼痛並宜木香流氣飲應膈上諸般冷氣不問痞塞及疼痛且與姜汁一

二盞痰飲尤宜

邪氣作痞宜用疎劑若氣不順逆上爲痞此乃虛痞

愈踈而痞愈作宜於收補中微有踈通之意不可十分用香劑古方載瀉後膈痞用理中卽此意也

因七氣所傷結滯成疾痞塞滿悶宜四七湯或導痰湯加木香半錢或下來復丹因冷氣滯停中脘痞塞並可用搗脾湯加丁香或丁沉透膈湯因傷食痞塞見諸傷門傷食證氣虛上逆遂成痞塞而疼者六磨飲吞黑錫丹

若痞塞服諸藥不効大便不甚通者宜感應丸加巴豆或半硫丸備急丸木香檳榔丸通之

因怒痞塞見本門七氣證諸五噎五膈並宜五膈寬

中散不効谷神加禾散前痞塞諸藥皆可選用噎膈甚而水漿不入藥食皆不下食入口即吐者當鎮墜之宜鹽湯下靈砂丹仍以嘉禾散作末乾點服

積聚

五臟之積曰五積六腑之積曰六聚積有定形聚無定處不問何經並宜十味大七氣湯吞下尊貴紅圓子須日數服木香檳榔去氣積神麩麥孽去酒積蠱蟲水蛭去血積礞石巴豆去食積牽牛甘遂去水積雄黃膩粉去涎積硃砂水銀去肉積各從其類也有飲癖結成塊在腹脇之間病類積聚用破塊藥多

不効此當行其飲宜導痰湯何以知爲飲其人先曾
病瘥口吐涎沫漬水或素來多痰者是也

又多飲人結成酒癖腹肚積塊脹急疼痛或全身腫
滿肌黃少食宜十味大七氣湯用紅酒煎服

肝積在左脇下狀如覆杯或如鱉或嘔逆或痛在兩
脇牽引小腹足寒轉筋又則如瘡名曰肥氣宜大七
氣湯煎熟待冷却以鐵器燒通紅以藥淋之乘熟服
肺積在右脇下大如覆杯氣逆背痛或少氣喜忘目
瞑膚寒皮中時痛如風緣針刺又則咳喘名曰息賁
宜大七氣湯加桑白皮半夏杏仁冬半錢

心積起臍下直至心大如臂腹熱咽乾心煩甚則吐血名曰伏梁宜大七氣湯加石菖蒲半夏各半錢

脾積在胃脘大如覆杯痞塞不通背痛心疼饑減飽見腹滿吐泄足腫肉消久則四肢不牧名曰痞氣宜大七氣湯下紅圓子

腎積發於小腹奔上至心上下無時如奔豚走饑見飽減小腹急腰痛口乾目昏骨冷久則骨痿名曰奔豚宜大七氣湯倍桂加茴香炒練子肉各半錢

若腹中似若瘕瘕隨氣上下未有定處宜散聚湯

若氣作痛遊走心腹間攻刺上下隱若雷鳴或已成

積或未成聚以全蝎一箇劈破煎湯調蘇合香圓

有正當積聚處內熱如火漸漸遍及四肢一日數發如此二三日又愈此不當攻其熱

又有元得熱病熱留結不散遂成癥癖此却當兼用去熱之劑

有病癥瘕腹脹純用三稜莪朮以酒煨服下一物如黑魚狀而愈或加入香附子用水煎多服取効

又有病此者用姜蘇湯吞六味圓六味者乃小七香圓紅圓子小安腎圓連翹圓三稜煎理中員六件等也

諸飽氣並見諸痛門腹痛證

腫

腫病不一遍身腫四肢腫面腫脚腫方謂之水氣然
有陽水有陰水並宜先用五皮飲升降湯或除濕湯
加木瓜腹皮各半錢如未効繼以四磨飲兼吞桂黃
圓腫者總名曰鍾也寒熱氣所鍾聚也應陰水陽水
及蠱脹服藥外並宜赤小豆粥佐之

遍身腫煩渴小便赤澁大便多閉此屬陽水輕宜四
磨飲添磨生枳殼兼進菜菔飲重則踈鑿飲子萬靈
飲利之以通爲度

亦有雖煩渴而大便已利者此不可更利宜用五苓散加木通大腹皮半錢以通小便或分心氣飲

遍身腫不煩渴大便自調或澹泄小便雖少而不澀赤此屬陰水宜實脾飲小便多少如常有赤時有不赤時至晚則微赤却無澀滯者亦屬陰也不可遽補木香流氣飲繼進復元丹若大便不澹氣息脹滿宜四磨飲下黑錫丹

感濕而腫者其身雖腫而自腰下至脚重腿脹滿尤甚於身氣或急或不急大便或澹或不澹但宜通利小便多服五苓散吞木瓜圓間進除濕湯加木瓜腹

皮各半錢炒蘿蔔子七分半碾碎之

有患生瘡用乾瘡藥太早致徧身腫不可妄施他劑
若大便不通升麻和氣飲若大便如常或以自利當
導其氣自小便導之宜五皮飲和生料五苓散腹若
腫只在下宜除濕湯和生料五苓散加木瓜如澤瀉
之類

有元腎氣根下注而成脚腫此當就元頭上治不可
妄以脚氣藥施之蓋氣入腎則先脚腫而後腎疼腎
氣注則先腎疼而後脚腫五心缺而平唇腫臍突者
不可治

病後浮腫此係脾虛用二分平胃散一分五苓散和
勻湯調或生料煎服或用生料平胃散加木瓜腹皮
人參各半錢茯苓一錢或六君子湯加木香半錢腫
甚者木香流氣飲

有渾身水腫以青蛙一二箇去皮火炙食之腫退亦
有單獨腹脹用亦不効者

治陽水浮腫敗荷葉燒存性碾末米飲調下荷葉服
之令人瘦劣今假病欲容體瘦以示人者一味服荷
葉灰故可以退腫

浮腫之處若焮熱赤腫而堅其人或增寒壯熱或爲

癰疽或遍身生瘡而腫並見瘡毒門

四肢腫謂之肢腫宜五皮飲加姜黃木瓜各一錢或
四磨飲

脚腫見本門脚氣證

面獨腫蘇子降氣湯兼氣急者尤宜或煎熟去滓後
更磨沉香一呷

有一身之間唯面與雙脚浮腫早起則面甚晚則脚
甚經云面腫爲風脚腫爲水乃風濕所致須問其大
小腑門通閉別其陰陽二證前後用藥惟除濕湯加
木香腹皮白芷各半錢可通用或以蘇子降氣湯除

濕湯各半貼煎之

蠱脹

蠱與鼓同以言其急實如鼓非蠱毒之蠱也

俗謂之膨脝又謂之蜘蛛病所感不同止是腹大而急餘處皮肉如常未辨何證宜用木香流氣飲或五苓散

此病多以積漸而致或是病後藏氣未復邪氣乘虛切不可妄下氣急者蘇子降氣湯虛者可用谷神加禾散加熟附子半錢佐以復元丹

若腹內熱急大便或祕者宜備急圓或木香檳榔圓

或用大黃厚朴陳皮枳實通大便上策

若因食傷而腹暴脹見傷門傷食證

中毒腹脹權宜用解毒圓或甘豆湯

脚氣

附下血

風寒暑濕足常履之遂成脚氣諸邪氣不問久近乾濕
及屬何經並可用除濕湯加木瓜檳榔白芷各半錢
或芩芷香蘇散加赤芍藥草薜各半錢仍吞木瓜圓
此藥宜常服脚氣發動而兩足痛不可忍者五積散

加全蝎三五箇入酒煎

若鶴膝風則於五積散中加松木杉木二節

脚氣發動必身痛發熱不可妄用傷寒等藥緣脚氣類傷寒若卒起脚弱或小腹不仁或舉體轉筋或見食嘔逆或兩頸赤腫便當作脚氣治乾者於前二藥中或更加蘿蔔子炒研碎半錢濕者於前二藥中加青橘皮十數片

切記脚氣不可令下寒亦不可妄用寒藥得溫則消散

脚氣跟注一孔深半寸許每下半日疼異常此乃脚氣注成漏以人中白於火上煨中有水出滴入瘡口脚氣發熱不退者敗毒散加木瓜一錢或用敗毒散

五積散各半貼和勻名交加散更加木瓜一錢

若久履濕而得兩脚或腫或瘡五苓散下或和氣飲
加木瓜蘿蔔子各半錢大黃一錢

脚氣小便不通者生料五苓散一貼除濕湯一貼加
木瓜二錢重分二服若大小便俱不通五苓散復元
通氣散

脚氣喘急者此係入腹宜蘇子降氣湯或沉香降氣
湯仍佐以養正丹或四磨飲

脚氣迫肺令人喘嗽宜小青龍湯每服加入檳榔一
錢重煎服

脚氣畏食者宜生料平胃散加木瓜一錢嘔逆惡心
八味平胃散加木瓜一錢

脚氣日久脚脛枯細或寒或熱或疼或痒或一脚偏
患軟弱躄曳狀如偏風者宜小續命湯加木瓜或獨
活寄生湯附子八味湯吞活絡丹虎骨四斤丸之類
脚氣血虛芩芷香蘇散內加木瓜羌活赤芍藥如芩
芷之類

脚轉筋用龍膠散

脚心痛者宜大聖散二錢入木瓜末半錢一作一錢
豆淋酒調仍用川椒香白芷草烏煎湯洗